

弘

簡

錄

弘簡錄卷一百九十四

明刑部員外郎仁和弘齋邵經邦學

皇清翰林院侍講學士四世孫遠平校閱

雜行 宋十二之一 建民

陳搏 戚同文等 王昭素 傅霖 种放

萬適 附田詩 李演 魏野 邢敦

林逋 子有 高擇 韓退 徐復 郭京 周啓明 張愈

代淵 劉易 章晉 袁滋 陽孝本 劉蒙

張舉 鄧孝甫 王當 陳慥 趙俊

劉化源等 王忠民 蘓雲卿 郭雍 安世通

劉宰 張惟孝 馮去非 父 鄭思肖 新增

陳搏字圖南亳州真源人四五歲戲渦水側有青衣媼乳之豁

然慧悟漸次觀經史百家言一過成誦悉無遺亡作詩有名後唐長興中應舉不第遭天下亂祿仕意絕娛遊山水遇高士孫君仿麋皮處士語以武當山九室巖可居遂往棲焉精通易理常自號扶搖子因辟穀服氣二十餘年但日飲酒數杯又移居華山雲臺觀依止少華石室無心世事居嘗寢處輒百餘日不起周世宗聞其得道命華州送至闕留禁中月餘從容延問黃白之事對曰陛下君主四海當以致治爲念奈何留意於此命爲諫議不受求放還山詔州縣長吏歲時存問後聞宋祖禪位一笑墮驢曰天下自此太平矣太平興國中來朝太宗待之加厚九年復來朝禮重不與他等因語宰相宋琪等曰搏獨善其身不干勢利所謂方外之士也自居華山已四十餘年度其年近百歲與之語甚可聽送至中書琪等問以先生得玄默修養

之道可以教人乎對曰山野之人於時無用亦不知神仙黃白之事吐納養生之理非有方術可傳假令白日上昇何益於世今聖主龍顏秀異有天人之表博達古今深究治亂真有道仁聖之主公等協心同德興化致治勤行修煉無出於此因各稱善以其語白上益稱重之賜號希夷先生賜以紫衣一襲令有司增葺所止雲臺觀上屢與之屬和詩賦數月始還端拱初忽謂弟子賈得昇曰汝可於張超谷鑿石爲室吾將憩焉二年秋七月石室成手書言臣搏大數有終聖朝難繼已於今月二十一日化形於蓮花峯下張超谷中如期而卒經七日支體猶溫有五色雲蔽於洞口彌月不散所著有指玄篇八十一章王溥爲箋釋又有三峯寓言及高陽釣潭二集祥符四年真宗幸華陰至雲臺觀閱其畫像爲除觀田租稅

成同文字子約應天府楚丘人家世儒業幼孤養大母以孝聞
卒晝夜哀號不食數日從虞城人楊慤授禮記日誦一卷彌益
勤勵累年衣不解帶由是畢誦五經慤妻以女弟遭晉末喪亂
遂隱居不仕思惟得見混一故名同文慤亦力學勤志不求聞
達與依將軍趙直家直厚待之爲同文築室聚徒登第者五六
十人宗度許驤陳象輿高象先郭成範王弼滕涉皆門弟子踐
歷臺閣爲人純粹質直尚信義樂施與喜聞人善未嘗較長短
慈遇疾托以家事爲營塋三世數喪不積財營產恒以徇義爲
亟冬月解衣裘與寒者宗隣有乏多周給之深爲鄉里推服遇
有不循孝悌者必諭以善道所交宗翼張昉滕知白皆文人名
士楊徽之與唱酬有孟諸集二十卷長子維任隨州書記迎就
養卒於漢東年七十三徽之與門人追號堅素先生維建隆中

以屯田員外郎爲曹王府翊善累遷職方郎中致仕卒年八十
一 宗翼上蔡人篤孝恭謹負米養母好學彊記經籍一見卽
能默寫通歐陽虞柳楷法兼能屬文隱居不仕未嘗以貧窶干
人家無斗粟怡如也市物不評價人知而不欺早作夜休必辨
昏曉旣瞑未曙皆不出戶見人雖幼待之如成人未嘗欺給同
父與之遊稱翼勞謙有古人風真吾友也卒年八十餘子度登
進士至侍御史歷京西轉運使預修太祖實錄知白善爲詩至
刑部員外郎河北轉運使子涉爲給事中象先淳化中爲三司
戶部副使卒于光祿少卿父凝祐刑部郎中以彊幹稱成範最
有文山安定掌書記累遷倉部司封二員外郎致仕卒礪卽堯
臣之祖

王昭素酸棗人當五代時篤學不仕隱居教授自給李穆并弟

肅及李惲皆師事焉。博通九經兼究莊老尤精易學讀王韓所
注孔馬疏義或未盡是自著易論三十三篇素喜穆沉厚曰此
子能得吾精理往往出人意表他日必至廊廟盡以所學傳之
開寶中穆果貴顯薦召赴闕見於便殿時年七十七精神不衰
太祖恨相見之晚問何以不求仕進對曰草野蠢愚無裨聖化
焉敢求進賜之坐令講易乾卦宰相薛居正等咸在至飛龍在
天欽容對曰此爻正當陛下今日之事援引証據因示諷諫微
旨上大悅問以治世養身之術對曰治世莫若養民養身莫若
樂慾上嘉其所言誠實無隱命書于屏几留月餘以衰老求歸
授國子博士致仕賜茶藥及錢二十萬壽八十九卒於家生平
雅有至行鄉里服之有爭訟不詣官府咸往就決每市物隨所
言還直未嘗論高下治所居室餘椽木積門中盜至窺之昭素

潛擲屏處令自取盜慙而去里中化之誓不爲盜家有贖人多
來假至已欲出問無假贖者然後行其純實類此子仁著亦有
隱德

傅霖青州人自少靜默久乃心通有覺不求仕進以巢由自許
與張詠同學心契甚密每有書來詠必先徵於夢寐以是益相
敬信開寶中會於潞城相與談論古今日夕不輟鄰舍有病瘡
爲之不作詠旣顯達霖深居遁跡求之三十年不可得作詩寄
曰前年失脚下漁磯苦戀明時不忍歸爲報巢由莫相笑此心
非是愛輕肥霖答詩曰忍把浮名賣却閒門前流水對青山青
山不語人無事門外風花任往還晚年詠守宛州被褐騎驢叩
門大呼日子將去矣故來報子別後一月詠果卒

种放字名逸洛陽人父詡由吏部令史補長安簿有子皆干進

放獨無意自幼沉默好學善屬文每往來嵩華間慨然有山林之意父卒與母入終南豹林谷之東明峯結草爲廬僅庇風雨以耕習爲業資束修養母母亦樂道薄嗜味後得辟穀術遂不娶終身遇山水暴漲道阻絕糧輒食芋栗每幅巾短褐負琴携壺沂長溪坐磐石餌山藥往往竟日值月夕或至宵分自豹林抵州郭七十里徒步與樵人往返間如也素不善浮圖見佛經輒裂之所著蒙書十卷及嗣禹說表孟子上下篇太乙祠錄人頗稱之多爲歌詩性嗜酒曰空山清寂聊以養和自號雲溪醉侯并作傳以述其志淳化中轉運宋惟翰言于朝使召之母患曰嘗勸汝勿聚徒講學身既隱矣烏用人知放乃稱疾不起其母盡取筆硯毀之與轉居窮山深僻人跡罕至太宗嘉其節詔京兆賜緡錢養母有司歲時存問不奪其志咸平初母卒水漿

不入口三日廬於墓側宋湜錢若水王禹偁皆言其貧真宗賜以錢帛并米以助其喪及張齊賢守京兆薦放隱居丘園博通今古孝悌之行鄉里所推特遣供奉官周旺促召赴闕由是隱節稍稍不終祥符中嘗上議道議德議刑議器議文武議制度議教化議賞罰議官司議軍政議獄訟議征賦議刑政凡十三篇八年十一月乙丑晨興忽取前後所著悉焚之服道士衣與諸生會飲酒數行而卒

萬適字縱之宛丘人自號道玄子六七歲卽能爲詩及長喜學問精於道德經與高錫族子覓及韓丕遊酬唱多警句遁跡嵩山不求仕進專務著述有任簡集百卷雅書三卷志苑三卷雍熙詩二百首經籍植科討論四十卷淳化中丕爲學士上因召對問卿早在嵩陽當時流輩頗有遺逸否乃以適及楊璞田誥

爲對上悉令召至闕授適慎縣簿趙素強力無恙詔下日忽病
勉強赴謝數日而卒 田誥歷城人隱居教授學徒嘗至數百
登第顯達者相踵宋惟翰許袞皆其弟子好著述每搆思必匿
深草中絕不聞人聲俄自草中躍出卽一篇成矣卒後有百餘
篇傳世 楊璞字弁立新鄭人善歌詩嘗杖策入嵩山窮絕處
搆思成百餘篇士大夫多傳誦之與畢士安尤相善每乘牛往
來郭店自稱東野遺民被召對于便殿不願仕賜以茶帛還作
歸耕賦以見志真宗朝諸陵道出鄭州遣使賜以茶帛與一子
出身卒年七十八

李濱字長源先洛陽人六世祖坦唐馮翊令五世仲芳大理司
直高祖玄初福建觀察推官曾祖鄧字堯封仕梁歷滑魏宋三
鎮留後拜崇政使吏部尚書後唐天成中以太子少傅致仕卒

贈太保祖延昭殿中丞父瑩字正白善詞賦登廣順進士辟補
帥張鐸記室因家河中乾德初補闕蘓德祥薦爲殿中侍御史
度支判官使江南坐受賂遺貴右贊善大夫卒浪以禱於河神
而生故名自幼淳澹好古博覽經史家聚書畫頗有奇妙年十
六丁外艱服闋杜門隱居王旦李宗諤與之世舊每勸其仕不
答性惡喧囂所乘馬爲宗人借憇于厩間卽鬻之往來中條山
中娛情山水不親產業所居木石幽勝談唐宋以來衣冠人物
歷歷可聽王佑典河中深加禮待前後州將亦厚遇之真宗祀
汾陰直史館孫冕言其隱操陳堯叟又薦其德能化鄉閭遣使
召見自陳習靜避世之意辭不奉詔自是屢加使命存問不絕
素嗜酒藉以扶羸養疾嘗語諸子苟遇醉而卒吾之願也天禧
三年臘月三日忽有人誦詩云行到水窮處未知天盡時言訖

不見濱曰吾當逝矣亟取所營集七十篇洎書畫付諸子促家人置酒頃之卒年六十三詔贈秘書省著作佐郎賜其家粟帛所在常加存恤仍蠲差役

魏野字仲先陝人濱表弟世爲農母夢引袂於月中承兔得之及長耽嗜吟咏不求聞達居州之東郊手植竹樹清泉環遶旁對雲山景趣幽絕鑿土袤丈曰樂天洞前爲草堂彈琴其中好事者多載酒肴從之嘯詠終日前後郡守武臣故相皆加禮遇或親造之往往留題累宿而去性不喜巾幘見賓客惟白衣草履出則跨白驢趙昌言素倨獨野至戒關吏卽報特置賓次爲詩精苦有唐人風格句多警策著草堂集十卷祥符初弊丹使言本國得其上帙願求全部詔與之祀汾陰與濱並薦遣陝令王希招野野自言願守畝畝永荷帝力上不之強詔州縣長吏

常加存撫令圖所居觀之生平無疾以濟計至哭之勸命子往
赴曰吾不可往往必不至裁六日果卒年六十州上其狀詔贈
秘書省著作郎

邢敦字君雅雍丘人嘗舉不第慨然有遯世之意耽玩經史精
於術數工繪畫頗嗜酒或遊市廛過客詢以休咎多不與語里
中號邢夫子性介辟不妄交友惟與宋準趙昌言相厚祥符七
年真宗幸亳邑人上其事王曾以聞詔授許州助教敦辭不受
受乾興元年無疾卒年七十四

林逋字君復錢塘人自少孤力學好古不拘拘章句性恬淡薄
榮利家貧衣食屢歉晏如也遨遊江淮久乃歸杭結廬西湖之
孤山多植梅以自娛得句如疎影橫斜水清淺暗香浮動月黃
昏傳以爲絕唱凡二十年足不及城市真宗聞其名賜粟帛詔

長吏歲時勞問薛映李及每造之必竟日清談然後去卽廬側
爲墓臨終作詩有茂陵他日求遺稿猶喜曾無封禪書之句州
錄聞上仁宗嗟悼賜諡和靖先生賻以粟帛生平善行書詩詞
澄淡峭特旣就稿隨輒棄去或勸錄以示後曰吾方晦迹林壑
且不欲名一時况後世乎然好事者往往竊記今所傳尚三百
餘篇初客臨江遇李諗方舉進士未有知者通語人曰此公輔
器也卒後諗爲州守素服與其門人臨七日塋之刻遺句內壙
中逋不娶無子教兒子宥登進士宥字大年頗介潔自喜英宗
時爲侍御史中丞唐介奏其避事出知蘄州卒于官

高惲字文悅季興四世孫年十三能屬文旣長博通經史百家
偕稷山人韓退俱往終南從种放受業放奇惲不敢列于弟子
與同時張堯許勃號南山三友寇準聞其名薦之辭不起景祐

中錄國初侯王後懌推與其弟忻及范雍建京兆學召懌講授
諸生席間常滿杜衍請賜處士號仁宗賜曰安素先生詔州縣
歲時禮問給良田五百畝文彥博表其經術該通有高世之行
可以激勵風俗詔賜第一區嘉祐中夢道士持素書聘爲白鹿
洞主卒韓退母死負土成墳徒跣終喪去隱嵩山吳遵路石
延年論其高節詔賜粟帛以壽終號安逸處士

徐復字復之建州人學易通流衍卦氣法自筮無祿遂志進取
遊學淮浙間數年益通陰陽天文地理遁甲占射諸家之說他
日聽其鄉人林鴻範說詩忽若有得自此推及於樂聲器表裏
相因以求得其清濁高下七音十二律以及鐘磬侈弇匏竹制
度悉皆洞達見胡瑗所作鐘磬笑曰聖人寓器以聲今不先求
其聲而更其器其可用乎後果制作不効范仲淹問四裔變異

復占以衍卦西方當用兵推其月日後皆無差慶曆初與布衣郭京俱召見問天時人事復推以易卦及今年所配年月日時正當小過剛失位而不中其在彊君德乎又問明年主何卦曰乾卦用事說至九五盡而止所言多及諷諫又問前年京師黑風何應曰兆在內豫王喪卽其應也命爲大理評事固以疾辭賜號冲晦處士補其子發校書郎爲人性高潔而處世未嘗自異後居杭州十數年卒 郭京少任俠不事家產平居好言兵范仲淹滕宗諒數薦之

周啓明字昭回由金陵占籍處州初以書謁楊億大見稱賞優加禮待自是知名祥符中舉直言極諫議者謂非封禪太平事由是報罷乃浩然而歸教授弟子及門嘗百餘人不復有仕進意里人稱爲處士運使陳堯佐表其行詔賜粟帛仁宗朝除試

助教就加廩給久之遷秘書郎終太常丞平生篤學有文藏書數千卷手傳口誦有古律詩賦牋啓雜文千六百餘篇

張愈字少愚益州郫人雋偉有大志寶元初上書言邊事其論甚壯使者薦除秘書郎願以授父顯忠文彥博爲治青城山白雲谿杜光庭故居以處之丁內艱再期鹽酪不入口所持柳杖植於墓忽生枝葉後合抱性喜奕棋樂山水杜門著書妻蒲氏名芝又賢而有文遇有興輒盡室以往遂浮湘沅觀浙江升羅浮入九疑歷數千里載鶴而歸卒之日妻爲之誄曰高視往古哲士貴殷施及樂漢餘烈氛氲挺生英傑卓爾逸羣其人伊何白雲隱居超世不偶是名丈夫仕非其志祿不可淹營營末途非吾所安窮本自固困不自顛謝除人爵知命樂天脫簪散髮眠雲聽泉有峯千仞有溪數曲廣成遺址吳興高躅疏石通徑

依林架屋麋鹿同羣。登遊夜息。橫月披雲。秋霖洒竹。清意何窮。
其心自得。放言遺慮。何榮何辱。孟春感疾。閉戶不出。豈期遂往。
英標永隔。抒詞哽咽。涕洟人誰無死。惜乎才賢人多傳誦
之。

代淵字蘊之。代州人。世爲吏。有陰德。性簡潔。事親以孝。聞受學
于李旼。張達。年四十舉進士。得清水簿。親喪歎祿不及養。淡于
仕進。居家教授。坐席滿。舉爲鳳州團練推官。不就。知益州楊
日嚴又薦之。遂以太子中允致仕。謝絕諸生。著周易旨要。佛老
雜說數十篇。田況上其書。自太常丞改祠部員外郎。晚年日菜
食。巾褐。山水間自號虛一。長吏歲時致問。澹然與對。畧不及私。
嘉祐二年九月有疾。擇日云丙申吉。是日沐浴而絕。

劉易忻州人。善爲詩。性介烈。博學好古。兼喜談兵。韓琦知定州。

深敬之每爲書所作詩於石或不可其意輒簾去再書不辭尹
洙帥涓延致尊禮狄青遇之亦厚治平中上所著春秋論授太
學助教并州學說書皆不就寓居號之盧氏趙抃復薦其行誼
賜號退安處士卒琦祭以文云剛介之性天下能合者有幾淵
源之學古人不到者甚多其爲所知如此熙寧中詔加七品恩
以示優禮

章啓字隱之成都雙流人少孤鞠於兄嫂事如父母博通經學
尤長易太玄著發隱三篇明用著索道之法知以數寓道之用
三舉九據始終之變蜀守蔣堂楊察張方平何邾趙抃咸舉逸
民賜粟帛授州助教不就嘉祐中賜號冲退處士王素更所居
鄉曰通儒以旌之辟穀三十餘年雖老強力尚足每以氣治疾
以道自裕尊生養氣不以憂喜是非撓其心形里人范百祿因
弘簡錄

從扣太玄。誓爲解述大旨。再復摘詞曰。凡人所好而不足者。善也。所醜而有餘者。惡也。君子能強其所不足。而拂其所有餘。太玄之道幾矣。此子雲仁義之心。予惟述此而已。若苦其思。觀其言。迂擗其所以爲數。而忘其仁義之大。是惡足以誦夫道哉。熙寧初卒。年七十六。子禕亦敦行義。好古學。世有隱德。嘗應韶敦遣。不赴。今所居猶存。後袁滋問易於伊川曰。易道在蜀。蓋往求之。滋入蜀。訪問久。無所遇。已而見賣醬薛翁于肩。叩問與語。大有所得。皆蜀隱君子也。

陽孝本字行先。虔州人。學博行高。隱於城西通天巖二十年。獨居不娶。一時名士多從之游。崇寧中舉八行。獮頌蒲宗孟又以山林薦。特起。皆不赴。獮賦自海外歸。過而愛焉。號之曰玉巖居士。贈詩有衆謂元德秀自稱陽道州。蓋嘉之也。年八十四卒。

同時劉蒙字子明渤海人耻爲詞賦不欲自售都運劉庠以遺
逸薦召知湖陽縣免役法行語常平使者以爲不便退而條上
其害卽投劾去奪官歸鄉教授終親講學從遊甚衆元豐二年
卒纔年四十門人朋友誄其行號曰正思先生元祐初賜其家
帛五十匹樂京荆南人行義見稱鄉里事母至孝妻張氏家
絕嗣挾女弟隨嫁未嘗一見其面妻死寢食于外卒爲嫁之嘉
祐初以遺逸聞除校書郎累知湖陽赤水二縣神宗求直言答
以畏天保民轉知長葛助役法行列其不便可去奪職十年復
官監黃州酒稅以承議郎致仕元祐初召赴闕不至終于家
張舉字子厚常州人親在以無兄弟斯須不忍去左右登甲科
親友彊赴調授青溪簿不肯之官閉戶讀書四十年夜分不寐
手校羣經萬卷著書甚富元豐中孫覺胡宗愈范祖禹交章薦

其高行言使舉且死草萊後世必以爲朝廷羞起爲潁州教授
不就元祐中蘓軾又言其孝弟修於家忠信行於友聲名聞於
人陷中守常從容不迫爲當時名流所慕以不造其門爲耻詔
除秘書省校書郎勅郡縣致禮收遺竟不出崇寧四年卒賜諡
正素先生

鄧孝甫字成之臨川人第進士歷陳留尉萬載永明上饒三縣
令積官奉議郎提點開封府界河渠坐事去官閉戶著書不復
言仕元符末詔求直言年八十一上書言自新法亂天下末流
之禍權臣迭起欺世誤國不可勝言今宜以時更化純法祖宗
蔡京嫉之目爲詆訕宗廟入上書邪等削籍羈管筠州後去黨
碑同逐者皆得釋惟孝甫與范柔中封覺民不免遂卒於筠嘗
作誌自許山中宰相虛有其才文昌先生虛有其作不得用於

世蓋有天命吾何憾焉所論述有卜世大寶龜伊周紫蘊義命
雜著太平策要二百五十餘篇

王當字子思眉山人好學博古通王佐大畧嘗言三公論道經
邦燮理陰陽鎮撫四方親附百姓皆出於一道其言之雖大其
行之甚易於經學尤遠易與春秋皆爲之傳人稱得聖人之旨
應舉不第退居田野元祐中蘓轍薦舉賢良方正廷對慷慨不
避權貴策入四等調龍游縣尉蔡京舉爲官不就遂不復仕歎
曰士之居世苟不見其用必見其言著春秋列國名臣傳五十
卷又有經旨三卷史論十二卷兵書十二篇人皆傳誦卒年七
十三

陳慥字季常希亮之子少與蘓軾遊論用兵及古今成敗自謂
一世豪士稍壯折節讀書晚遜於光黃間曰岐亭庵居常蔬食

徒步往來山中。妻子奴婢皆有自得之意。不與世相聞。人莫識也。見其所著。輒方屋而高。因謂之方山子。及軾謫黃過岐亭。識之人始知其爲慥云。

趙俊字德進。南京宋城人。登紹聖進士官。至朝奉郎。隱居杜門。不妄交遊。劉安世居河南。嘗過之。劇談竟日。徐處仁相與厚善。及得政。鄉人多見用。俊絕跡不往。金寇亂。士大夫皆避地。俊獨守衡門。嘆曰。一椽何足以資敵死生。有命。避將安之。衣冠多困踣于道。卒亦晏然無事。劉豫僭號。俊但書某甲子。雖遭虐。儼不肯改易。逼爲虞部員外郎。辭疾不受。以詰畀其家。拒卻之如是再三。遂不復出。安貧固守多著述。後三年以疾卒。贈承直郎。劉化源。米瑛。劉長孺。俱耀州人。化源登紹聖進士。知隴州。及金人陷關陝。守令以城降者。卽復原任。惟化源不肯。遂被執。使人

守之不得死驅入河北醫蔬果隱民間者十年終不屈辱西人
皆敬之璞登政和進士通判原州劉豫欲官之杜門謝病卒不
行偽命長孺簽書博州判官廳公事與豫審備陳祖宗德澤勸
以轉禍爲福豫怒追其官囚之百日終不屈後復官之不從紹
興九年宣諭司周聿上之朝詔三人俱赴行在樞密樓招言璞
苦風痺化源長孺老病遂命各轉兩官奉祠又鳳翔教授陰肆
守節不仕詔特改令入官其後金復渝盟長孺之華陰不屈而
死又開封人李嘉登宣和進士建炎中知彭陽縣因不屈與民
逃移外境令執獻金人授以儒林郎凡三辭劉麟問其賢命張
中孚以禮招致嘉力拒之紹興九年死原州事聞贈奉議郎官
其家一人

王忠民潁陽人幼通經史靖康間數言邊方利害于朝累召弗

至他國難隱居不出諸鎮翟典等欲致弗能皆重之建炎中張浚薦授廸功郎亦不受後避地南下遇商號鎮撫董先于內鄉留軍中事以師禮嘗作九思圖及定亂四象乞還二帝因劉豫以達於金主爲鑄板印圖散于偽境以明天下大義紹興三年翟琮薦其忠節持授宣教郎詔先津遣詣闕既至呂頤浩徐俯見之皆拜舍于政府懇辭所授官言臣憤金人無道故三上書本心報國非冀名祿不許乃以誥真廣中藏七寶山下力求去復依先軍中不出而卒

蘓雲卿初不知其何人紹興間來豫章東湖構得隙地結廬獨居待鄰曲有恩禮無良賤老稚皆敬愛之稱曰蘓翁身長七尺美鬚髯寡言笑布褐草履恂恂如也未嘗疾病披荆畚礪爲圃藝植耘麥灌溉培壅皆有法度常勝于別圃雖隆暑極寒土焦

草凍不絕佳蔬滋饔飴茂四時物品無闕市鬻者利倍而售速
先期輸直夜嘗織屨堅韌過他人爭買之以饋遠故嘗薪米不
乏有羨則以周急應貸假者負債一不經意暇或閉門高臥危
坐終日人莫之測張浚爲相物色之言與自少同鄉友魯馳書
函金帛屬豫章帥漕稱雲卿管樂流亞遁跡湖海有年矣其高
風偉節非折簡所能屈必親造其廬爲我致之帥漕乃屏騎從
更服爲遊士入其圃翁方荷鋤帥漕進揖問客何從來延入室
中土甃竹几地無纖塵案間有西漢書一帙帥漕恍若自失旣
而汲泉煮茗意稍欵洽遂扣其鄉里徐曰廣漢人曰張德遠當
識之曰然又問德遠何如人曰賢人也第長於知君子而短於
知小人德有餘而才不足因問今爲何官二人曰今朝廷起張
公欲了此事翁曰此恐怕他未便了得在語畢起而言曰張公

令其等致公共濟大業因出背幣寘几上聞其鼻間隱隱作聲
若自咎者臨行力請其載辭不可期以詰朝上謁旦遣使迎伺
則局戶間然排闥入書幣不啓家具如故而翁莫知所往矣帥
漕復命浚拊几自恨因嘆息識之曰雲卿雲卿風節高於傅霖
予期與之共濟當今山潛水沓逸不可尋弗力弗早予罪曷弋
郭雍字子和忠孝之子自幼傳父學隱居峽州號白雲先生乾
道中峽守任清臣湖北張孝祥屢薦旌召不起賜號冲晦處士
孝宗稔知其賢每對輔臣稱道之命所在州郡歲時致禮存問
淳熙初更封順正先生令部使者就問雍所欲言時年八十有
三乃裒集其言曰易貫通三才包括萬理伏羲氏之畫得于天
文王之重得于人義畫爲天天君道也故五之在人爲君文重
爲地臣道也故二之在人爲臣以上下二卦別而言之如此合

六爻而言則三四皆人道也故謂之中又乾元亨利貞初曰四德後又曰乾元始而亨者也利牝馬貞利君子貞是以四德爲仁義也乾陽物也坤陰物也山乾一卦論之則元亨利貞之類利與貞陰之類也是猶春夏秋冬雖爲四時山陰陽觀之則春夏爲陽秋冬爲陰也天之所以謂元亨利貞者如立天之道陰與陽之類也地之所以謂元亨利貞者如立地之道柔與剛之類也人之所謂元亨利貞者如立人之道仁與義之類也又坤之六五坤雖臣道五寔君位雖以柔德不害其爲君猶乾之九二雖有君德不害其爲臣故乾有兩君德無兩君坤有兩臣德無兩臣六五以柔居尊下之君也江海所以能爲百谷王者以其善下也下本坤德黃中色也色之至美也裳下服也是以至美之德而下人也其發明精到如此又至十四年方卒年九十七

安世通本西人隱居青城山中其父有謀策爲武官吳曦反世
通大勸獻書都帥楊輔曰某雖方外亦嘗辱大人先生啓以入
道之門竊以爲初得曦檄卽當鳴鼓誦言聲其罪戾忠義激發
聚官屬軍民素服號慟因而散金發粟閉劍門檄夔梓興仗義
之師以順討逆誰不願從而士大夫皆酒缸飯囊不明大義尚
云少屈以保生靈何其不知輕重如此也元君乃父也民乃子
也豈有棄父而抹子之理此非曦一人之叛乃舉蜀士大夫之
叛也聞古有叛民無叛官今曦叛而士大夫皆縮手以聽命是
驅民而爲叛也且曦雖叛猶有所忌未敢建立正朔殺士大夫
徒以虛文見招亦以公之與否卜民之從違今悠悠不決徒爲
婦人女子之悲所謂停囚長智吾恐朝廷之失望也凡舉大事
者成敗死生皆當付之度外區區行年五十二矣古人言可以

生而生福也可以死而死亦福也決不忍汗面戴天同爲飯民
其言懇切周至輔不能決世通遂東如江陵請吳玠舉兵未幾
玠敗玠使蜀首以世通薦

劉宰字平國金壇人素剛正明敏仁恕長於吏事登紹熙進士
調江陵尉嚴禁巫風斷妖術歲旱振荒多所全活不肯輕事筆
楚或以事出郊蔬食水飲與吏卒同調真州司法去日惟藏與
主簿趙師秀酬唱詩一帙而已當召試不肯自占不係僞學不
讀周程等書故不得與授泰興令屢決疑獄人驚以爲神父憂
免喪除浙東倉司幹官職事修舉會韓侂冑方啓兵端宰不樂
仕亟引去監南岳廟制使黃度辟之固辭嘉定四年召堂審復
不至執政貽書推挽宰峻辭絕之盡還磨勘歲月以示決不復
仕理宗收召諸賢宰一至吳門拜疏徑歸自此甘心隱遯經三

十年見義必爲施惠鄉邦置義倉創義役飢歲爲粥自冬徂夏
不絕薪粟衣纈藥餌棺衾之須隨謁隨予某無田可耕無廬可
居某之子女長未婚嫁皆汲汲經理如已實任其責雖質貸以
繼不恤也惓惓以民利病白于有司定折麥錢額更縣斗斛制
毀淫祠凡可以利鄉人者無不爲之卒之日鄉人罷市走送聯
袂相屬如喪私親平生無一嗜好惟書靡所不讀常夜以繼晷
雖博考訓注而自得爲多有漫塘文集語錄行世

張惟孝字仲友襄陽人少通春秋身長六尺工騎射城中亂爭
出關惟孝趨白河見一舟壯鉅急登之舟人不可惟孝呼曰今
日之事非汝卽我能殺我者得此舟衆披靡不敢拒舟達郢州
亂兵奔沙洋值卽別之傑盡盜諸湖惟孝令二人買服前行已
與十騎衣黑袍假爲敵兵給云後隊亟至守隘四五百人悉潰

隆慶元年卜居江陵至沙市遇舟大礙不可涉頃之宜撫姚希得弟我冠張蓋從者數十令曰敢有爭岸者投水中惟孝驛晚良久提劍驅左右而出舉白旗以麾令衆船登岸毋敢亂次者幹官鍾蜚英見而異之還語曰今日正我輩趨事赴功之秋惟孝不答退告唐舜申曰吾故人也因具言其平生明日蜚英導希得羅致之仲宣樓酒酣謂曰有國而後有家天下如此將安歸乎惟孝躍然曰從公所命乃請空名帖三十道以還逾旬與三十騎俱擁甲士五千至旗幟鮮明部伍嚴肅上至公安下及星山游路相繼希得大喜請所統姓名辭曰朝廷負人福難禍易聊爲君侯紓一時之難爾姓名不可得也時鼎澧五州危甚惟孝擊鼓耀兵數口衆至萬人數戰俱捷江上平制使呂文德招之不就而遁物色之不可得或云已趨淮甸後不知所終

馮去非字可遷都昌人父椅字儀之家居授徒所註易書詩語
孟太極西銘輯說孝經章句喪禮小學孔門弟子傳讀史記及
詩文志錄合二百餘卷去非登淳祐進士幹辦江淮轉運司治
儀真歐陽修東園在焉使者黃濤欲以爲佛寺力爭不得時已
許薦去非寧不受謁告而去寶祐四年召爲宗學諭時三學諸
生叩關論丁大全奸邪帝爲下詔禁戒立石學門去非獨不肯
書名碑下已而御史希意劾諸生下獄去非復調護之未幾大
全拜叅政遂罷歸舟泊金山有僧上謁致大全意願毋遽歸少
俟收召誠得尺書以往成命卽下去非奮然正色曰程丞相公
許蔡叅政抗牽率老夫至此今歸廬山不復仕矣斯言何爲至
我絕之不復與言

鄭思肖字憶翁號所南連江人祖咸枝江主簿父震字叔起淳

新道學君子爲安定和靖二書院山長有菊山詩集卒塋吳之
長洲思肖初入太學應博學宏詞科元兵南下扣關上太后幼
主疏辭切直忤當路不報宋亡遂隱不仕亦不復娶因更名思
肖卽思趙與憶翁所南皆寓意也念不忘君每每形於詩文中
如過徐子方書塾云不知今日月但夢來山川題鄭子封寓舍
云此世但知君父外不曾別受一人恩寒菊云寧可枝頭抱香
死不曾吹落朔風中贈人云天下皆變吾觀其不變惟其不變
廼所以變其變者物也不變者道也又云古人重立身今人重
養身立身者蓋超乎千古之上與天地周流於不知不識之天
也養身者惜一粟以活後命役於萬物死於萬變者也何足道
哉遇歲時伏臘輒野哭南向拜聞時人語掩耳亟走人亦不以
爲異坐臥皆南向扁其室曰本穴世界

以本字之十量精墨爾
下文則大宋也

不齊土根或問其故云地爲他地矣汝不知耶不欲與雖迫以
勢權不可得也趙孟頫才名重當世惡其受元聘遂與之絕孟
頫數往候之終不得見嘆息而去卒年七十八嘗著大無工十
空經一卷空字去工而加十宋字也造語奇澁咸莫可曉自題其後云臣思
肯啗三斗血方能書此後當有巨眼識之又著謬餘集一卷文
集一卷自叙一百二十圖詩一卷

弘簡錄卷一百九十五

明刑部員外郎仁和弘齋邵經邦學

皇清翰林院侍講學士四世孫遠平校閱

雜行 宋十二之二 藝學方技

趙脩已 王處訥 子熙元趙昭益 苗訓 子守信 馬韶 楚芝蘭

韓顯符 史序 鄭昭吳 周克明 祖作父茂元 楚衍 李觀

劉翰 王懷隱 陳昭遇 趙自正 鄭自化 馮文智 開文顯劉贊

藍洪蘊 法堅 許希 蘓澄隱 丁少微 許瓊

賀蘭棲真 趙自然 鄭榮趙抱一 柴通玄 劉吳鄭李寧 甄棲真

僧志言 僧懷丙 龐安時 錢乙 僧智緣

郭天信 魏漢津 楊傑 劉詵 陳賜 兄祥道

王老志 王仔昔 林靈素 王繼先 皇甫坦

莎衣道人

王克明

孫守榮

廖應淮

新增

趙脩已沒儀人精天文推步之學晉天福中李守真表爲滑州司戶叅軍從軍出征占候多中奏試大理評事賜緋守真陰懷異志屢以禍福諭之不聽辭疾歸鄉得免因是著名召爲翰林天文周祖鎮鄴奏叅軍謀微聞隱帝將害周祖密勸引兵南渡皆其策也卽位擢殿中省尚食奉御賜金紫改鴻臚少卿遷司天監顯德中累檢校戶部尚書嘗副陶穀使吳越宋初遷太府卿判監事上章告老不許建隆三年卒年七十一

王處訥洛陽人少時遇一老父煮洛河石如麵令食之又夢人持巨鑑中星宿燦然剖腹納之覺而汗洽心胸開悟因留意星曆占候之學深究其旨晉末避地太原漢祖辟置幕府卽位擢司天夏官正出補許田令召爲國子博士判司天監雅與周祖

厚善及入汴遠命訪求得之甚喜因問以劉氏祚短事對曰人君未得位嘗務寬大既得位卽思復讐多嗜殺人及奪人之族結怨天下所以運祚不長周祖蹶然太息適誅蘇逢吉劉銖等家待旦將行孥戮遠命止之廣順中遷司天少監世宗命詳定舊曆差舛成而未上會王朴作欽天曆以獻私語之曰此曆不久卽差因指以示朴深以爲然建隆二年欽天曆果誤受詔別造新曆經六卷三年而成御製序文名應天曆又以漏刻無準重定水稱及候中星分五鼓時刻俄遷少府少監太平興國初改司農少卿判監事六年又上新曆二十卷真拜司天監卒年六十八子熙元習父業開寶中補司天曆筭端拱初改監丞遷太子洗馬兼春官正加殿中丞景德中同判監事東封汾陰皆從授司天少監奉詔於後苑續陰陽事十卷真宗製序賜名

靈臺秘要及作詩紀之玉清昭應宮成授監正卒年五十八
又秋官正趙昭益能專其業人所鮮及嘗言所脩曆二年後必
差其災惑度數稍謬熙元頗伏其精後果驗

苗訓河中人善天文占候之術仕周爲殿前散員指揮使從太
祖北征祝日下復有一日黑光摩盪久而不退指示楚昭輔曰
此天命也夕次陳橋六師推戴訓預白其事受禪擢爲翰林天
文尋加銀青光祿大夫檢校工部尚書年七十餘卒子守信
少習父業補司天曆筭尋改主簿知筭造太平興國中應天曆
又差詔與冬官正吳昭素主簿劉內真造新曆及成又命衛尉
少卿元象宗同校定賜號乾元曆頗爲精密優賜束帛雍熙中
遷冬官正端拱初改太子洗馬判監事淳化二年癸一歲首正
月一日與每月八日三元日上帝及天地水府三官各下巡人

世伺察善惡太歲日爲歲星之精人君之象并天赦上慶誕日
皆不可斷刑未幾轉殿中丞權少監事賜金紫至道二年上心
憂梁雍宿兵彌歲凶歉令宰相問矢道皆證所在奏臣仰瞻玄
象及推驗太一經曆宮分其荆楚吳越交廣並皆安寧自來五
緯陵犯彗星見及水神太一來歲入燕分歲在房心正當京都之地
地民罹其災水神太一來歲入燕分歲在房心正當京都之地
自茲朝野有慶詔付史館明年真授少監咸平三年卒年四十
六子舜卿國子博士

馬韶趙州平棘人習天文三式開寶中太宗尹京申嚴私習天
文之禁素所善親吏程德玄每戒韶不令及門九年冬十月十
九日旣夕韶忽造德玄詰所以來對曰明日乃晉王利見之辰
故以相告德玄惶駭止韶一室遽入白太宗命置防守將聞于

太祖及旦果受遺踐阼因赦免授司天監主簿太平興國二年擢太僕寺丞改秘書郎太子中允遷丞出爲平息令召還復判司天監事遷太常博士淳化五年坐事出更博興長山二令秩滿歸鄉里卒於家

楚芝蘭汝州襄城人初習三禮過有道之士教以符天六壬遁甲之術屬朝廷博求方技詣闕自薦錄爲學生以占候有據擢翰林天文授樂源縣簿遷春官正判司天監事占者言五福太一臨吳分當於蘇州建太一祠芝蘭獨言京師帝王之都百神所集東南一舍地名蘇村若於此建五福太一宮萬乘可以親謁有司便於祇事何爲遠趨江外以蘇臺爲吳分乎輿論不能奪遂從其議仍令同定本宮四時祭祀儀及醮法官成特遷工部員外郎賜五品服與馬館俱坐事出爲遂平令卒年六十錄

其子繼芳爲城父縣簿

韓顯符少習天文三式善察祗辰象補司天監生遷靈臺郎累加冬官正專渾天之學淳化初表請造銅渾儀候儀詔給用度使專規度擇匠鑄之至道元年渾儀成於司天監築臺置之賜雜綵五十匹送上法要十卷其制有九事具天文志自是職專測驗轉春官正又遷太子洗馬改殿中丞兼翰林天文祥符三年詔擇可以授渾儀法者薦其長子監生承矩善察躔度次子知算造承規與主簿杜貽範保章正楊惟德監丞丁文泰皆可傳其學焉六年卒年七十四

史序字正倫京兆人善推步曆算太宗補司天學生親較試擢爲主簿稍遷監丞賜緋魚隸翰林天文雍熙二年廷試中選命知算造累遷夏官正河西環慶二路隨軍轉運太子洗馬修儀

天曆上之又纂天文曆書爲十二卷以獻改殿中丞賜金紫景德二年權知少監卒年七十六序慎密勤職在監三十年與司天鄭昭晏未嘗有過衆頗稱之淳化三年昭晏言臣測金火行度須有相犯今驗之天而火行漸南金度漸北有若相避不相凌犯又言木火金三星初夜在午木在東火在中金最西漸北行去火尺餘此國家欽崇天道聖德所感言皆有驗

周克明字昭文曾祖德扶唐司農卿祖傑開成進士除獲嘉尉歷弘文館校書郎僖宗在蜀上書言治亂擢水部員外郎三遷司農少卿精於曆算嘗以大衍曆數有差因數衍其法著極衍二十四篇以究天地之數遇五代亂占以天文惟嶺南可避乃遣其弟鼎求爲封州錄事參軍天復中傑亦棄官携家赴之至九十餘卒餘見南漢附載 父茂元亦世其學事龔至司天少

監歸宋授監丞而卒 克明精於傳授凡律曆天官五行讖緯
及三式風雲龜筮之書靡不究其指要開寶中授司天六壬改
臺主簿轉監丞遷春官正頗修詞藻喜藏書景德初嘗獻所著
文十編召試中書賜同進士出身三年出使嶺表有大星出氏
西衆莫能辨或言國皇妖星爲兵凶之兆還日亟言臣按天文
錄荊州占其星名曰周伯其色黃其光煌煌然所見之國大昌
是德星也願許文武稱慶以安天下心上從其請拜太子洗馬
至殿中丞兼翰林天文權判監事屬修兩朝國史命參天文律
曆事祥符九年坐擇日差互例降職天禧元年夏火犯靈臺語
所親曰去歲太白犯靈臺掌曆者悉被降譴今熒惑又犯之吾
其不起乎八月疽發背卒年六十四久居司天職著勤慎凡奏
對必據經蓋言上悼惜之賻賚優厚遣內侍諭其孀直龍圖閣

馮元主喪事初諸僭國皆有纂錄嶺南獨闕胡賓王胡元興二家皆不之備克明訪耆舊采碑誌華華著撰裁十數卷其書未成而罷

楚衍開封汴城人少通四聲字母里人柳曜師之既長於九章緝古綴術海島諸算經尤得其妙兼明相法及聿斯經善推步陰陽星曆之數間語休咎無不中自陳試宜明曆補司天監學生遷保章正天聖初造新曆授靈臺郎與曆官宋行古等九人製崇天曆成進本監丞入隸翰林天文皇祐中又同造司辰星漏曆十二卷與周琮同管勾監事卒無子有女亦善算術

李觀字泰伯南城人俊辨能文親老教授自資學者常數十百人皇祐初范仲淹薦試太學助教精於明堂制度著圖說畧曰按考工記周人明堂度九尺之筵是言堂基修廣非謂立室之

數東西九筵南北七筵堂崇一筵是言堂上非謂室中東西之
堂各深四筵半南北深三筵半五室凡室二筵是言四堂中央
有方十筵之地自東至西自南至北皆可營五室十筵中央方
二筵之地既爲太室連作餘室則不能令十二位各直其辰當
於東南西北四面及四角缺處各虛方二筵之地周而通之以
爲太廟太室居中月令所謂中央土居太廟太室者言此太廟
之中有太室也太廟之外堂子午卯酉四位上各畫方二筵地
與太廟通爲青陽明堂總章元堂四太廟當寅申巳亥辰戌丑
未八位上各畫方二筵地以爲左个右个也大戴禮明堂凡九
室室四戶八牖共三十六戶七十二牖八个之室并太室而九
室四面各有戶戶旁夾兩牖也白虎通明堂上圓下方八窗四
闕九室十二坐四太廟前各爲一門出於堂上門旁夾兩窗也

左右之个其實皆室但以分處左右形如夾戶故有个名太廟以祀文王配上帝之位故謂之廟土於五行最尊故天子當其時居太室川祭天地之位以尊嚴之也四仲之月各得一時之中與餘月有異故復於子午卯酉之方取二筵地假太廟之名以聽朔也周禮言基而不及室大戴言室而不及廟稽之月令則備矣然非白虎通亦無以知宮闈之制也聶崇義所謂秦人明堂圖者其制有十二階古之遺法當亦取之禮記外傳曰明堂四面各五門今按明堂位四裔之國南門之外北面東上九采之國應門之外亦北面東上天子負斧扆南嚮而立是南門之外有應門也既有應門則不得不有皋庫雉門明堂者四時所居四面如一南面既有五門則餘三面皆各有五門鄭注見王宮有路門其次乃有應門今明堂無路門而但有應門便謂

更無重門而南門卽是應門且路寢之前則名路門明堂非路寢乃變其內門之名爲南門而次有應門何害於義四裔之君旣在西門之外而外無重門又似列於郊野道路之間豈朝會之儀乎王宮嘗若猶設五門以限中外明堂者郊天法地尊祖配帝而止一門以表之豈爲稱哉若其建置之所則淳于登云在國之陽三里之外七里之內丙巳之地王藻聽朔於南門之外鄭康成注亦與是合夫稱明堂宜在國之陽事天神宜在城門之外今圖以九分當九尺之筵東西之堂共九筵南北之堂共七筵中央之地自東至西凡五室自南至北凡五室每室二筵取於考工記也一太室八左右个共九室室有四戸八牖共三十六戸七十二牖協於藏德記也九室四廟共十三位本於月令也四廟之面各爲一門門夾兩牕是爲八牕四闕稽於白

虎通也十二階采於三禮圖也四面各五門酌於明堂位禮記
外傳也嘉祐中除海門縣主簿終太學說書嘗著周禮致太平
論平土書并禮論熙寧中門人邵淵言上其退居類藁皇祐續
藁并後集官其子參魯郊社齋郎

劉翰滄州臨津人世業醫初攝護國軍節度巡官顯祐初獻經
用方三十卷論候十卷今體治世集二十卷世宗命爲翰林醫
官遷衛尉主簿建隆初從軍北征加朝散大夫鴻臚寺丞乾德
初考較優等開寶五年命視晉邸疾愈轉尚藥奉御賜銀器緡
錢鞍馬詔與道士馬志醫官翟煦張素吳復珪王光祐同詳定
唐本草凡神農本經三百六十種名醫錄一百八十二種唐本
先附一百一十四種有名無用一百九十四種參以新附一百
三十三種既成詔學士李昉知誥王祐員外扈蒙詳覆合新舊

九百八十三種廣頒天下加翰工部員外郎太平興國四年進翰林醫使改戶部郎中卒年七十二

王懷隱睢陽人初爲道士住京城建隆觀普醫診以湯劑祇事太宗藩邸時因多暇留意醫術藏常驗名方千餘首卽位詔翰林醫官各具家傳經驗方萬餘首以獻命懷隱與副使王祐鄭奇陳昭遇參對編類每部冠以隋太醫令巢元方病源候論次及方藥成一百卷御製序文賜名太平聖惠方頒行天下諸州各置醫博士掌之詔歸俗除尚藥奉御三遷至翰林醫官嘗視吳越王子惟濟疾有效詔獎之後數年卒 昭遇本嶺南人醫術尤精驗初爲醫官領溫水主簿後加光祿寺丞賜金紫 趙自正自化兄弟俱平原人高祖爲景州刺史陷契丹父知崑脫身歸寓居洛陽習經方名藥之術授其二子顯德中知崑卒

來京師悉以醫術稱自正試補翰林醫學自化診候秦國長公主疾有效表爲醫學加尚藥奉御淳化五年授醫官副使時隱士萬適館于其家怪適色變爲切脉言其死不數日果驗雍王元汾登晉國長主並言自化藥餌有功請加使秩卒年五十七遺表獻所撰四時養頤錄真宗改名調膳攝生圖仍爲製序生平頗喜爲詩有漢沔集五卷宋白李若拙爲之序又續自古方技至貴仕者爲名醫顯秩傳三卷

馮文智并州人世以方技爲業召試補醫學加樂源簿端拱初爲醫官授少府監簿至監丞療府州折御卿疾獲愈表薦賜緋加光祿寺丞咸平三年侍明德太后疾有效爲尚藥奉御賜金紫六年直翰林醫官院東封轉醫官副使祀汾陰加主客員外郎卒年六十咸平中上每便坐問軍士有被金瘡者卽令處

療一卒中流矢自頰貫耳衆醫不能取有閭文顯者以藥傅之
信宿而鍼出上嘉其能賜緋 又醫學劉贊亦善此術太宗征
晉陽都指揮韓最弩鍼貫左臂不出幾三十年詔遣贊視傳以
藥出之步履如故最見上自陳感激願得死所特賜贊白金遷
醫官

藍洪蘊長沙人少爲沙門習方技之書與廬山僧法堅俱遊京
師以醫術知名太祖召見並賜紫方袍號洪蘊廣利大師法堅
廣濟大師真宗在蜀邸嘗以方藥謁見咸平初補右街首座轉
左街副錄工於診切每先歲時言人生死無不應湯劑精至貴
戚大臣多遣診療療後還山卒年六十八

許希開封人補翰林醫學景祐元年仁宗不豫侍醫數進藥不
效人心憂恐冀國大長公主薦希診視請鍼心下包絡之間可

亟愈左右爭以爲不可諸黃門祈以身試無所害遂以鍼進帝
疾果愈命爲翰林醫官賜緋衣銀魚金幣希拜謝已又西嚮拜
帝問其故對曰扁鵲臣師也今者非臣之功殆臣師之賜敢忘
師乎請以所得金輿扁鵲廟帝爲築廟于城西隅封神應侯廟
完後學醫者歸趨之因立大醫局于其旁著神應鍼經要訣行
于世官終殿中省尚藥奉御錄子宗道至內殿崇班

蘇澄隱字棲真真定人爲道士住龍興觀得養生之術後唐明
宗召問令宰相馮道致書諭旨歷清泰天福中堅辭聘命不至
開運末契丹主兀欲加以恩命亦不受時貴李崧和凝日造其
室相與談宴賦詩以贈周廣順顯德中詔存問之太祖征太原
還駐蹕鎮陽召見行宮語以京師作建隆觀思得有道之士若
之師可行乎對曰大梁帝宅浩穰繁會非林泉之士所可寄迹

上察其意卽不之彊賜茶百斤絹二百駕幸其觀問師年踰八十而氣貌益壯其術安在對曰臣之養生不過精思練氣耳帝王養生卽異於是因誦老子我無爲而民自化我無欲而民自正無爲無欲神太和上古聖君享國永年得此道也上大悅賜紫衣一襲并銀器絹帛卒年百歲

丁少微亳州真源人爲道士持齋戒舉科儀精至尤善服氣多餌藥年百餘歲康強無疾隱于華山澗谷與陳搏齊名少微志尚清潔搏嗜酒適性其道不同未嘗相通嘗起壇場淨室通夕朝禮五十餘年未嘗稍懈時有華陰李琪自言唐開元中郎官已數百歲人罕見者與關西逸人呂洞賓年百餘歲有劍術面如童顏步履輕疾頃刻數百里世傳以爲神仙嘗至其處太平興國三年召赴闕獻金丹巨勝南芝玄芝留數月遣還卒

許瓊開封鄆陵人年九十九長子年八十一次子年七十九再
次名永年七十五開寶五年永罷盧氏縣尉詣闕欲乞近地一
官以便養上卽命迎瓊赴闕對于講武殿親臨顧問久之言唐
末以來事歷歷可聽詞氣不衰上悅賜襲衣犀帶茶帛授永鄆
城令是時漣密齊沂萊江吉萬州江陰梁山軍各奏八十已上
呂繼美等二十九人並賜爵公士真宗時凡老人年百歲已上

者州縣以名聞詔皆賜衣帛米麥長吏存撫之

賀蘭棲真自言百歲善服氣不憚寒暑或不飲食但飲酒遊市
鄆間能啖肉至數斤爲道士始居嵩山紫虛觀後徙濟源奉仙
觀張齊賢與之善景德二年遣內使李懷贊召赴闕真宗作詩
賜之號宗玄大師資以紫服白金茶帛香藥特蠲觀之田租度
其侍者祥符三年卒時大雪經三日頂猶熱人多異之

趙自然紫昌人本名王九家荻港旁以鬻茗爲業年十三疾甚
父抱詣青華觀許爲道士後夢一人狀貌魁偉綸巾素袍鬚髮
班白自云姓陰引之登高山謂曰汝有道氣吾教汝辟穀之法
夢中出青栢枝令嚼食及覺神氣清爽遂不食每聞火氣卽嘔
惟食生果清泉而已歲餘復夢向見老人教以道家符篆數百
字旣寤悉能記寫嘗爲元道歌言修煉之要知州王洞聞於太
宗召赴闕親問賜道士服改今名資錢三十萬月餘遣還住青
華觀祥符二年復委發運使楊覃訪其行迹命內侍武永全召
至闕屢得對賜紫衣改青華觀曰延禧以母老求還許之
鄭榮者本禁軍戍壁州還夜遇神人謂曰汝有道氣勿火食因
授以醫術救人祥符七年賜名自清度爲道士居上清宮所傳
藥能愈大風疾民多求之輒刺臂血和餅給焉

趙抱一秦州

民家子常牧羊田間有名之者以杖引行杖端有氣如烟其香
可悅至一山崖絕頂見數人會飲音樂交奏與人間無異駭而
不測會巡檢司過聞樂聲梯崖而上至則無所覩獨抱一在援
以下具言其故凡經數夕若俄頃自是不喜熟食茹甘菊栢葉
果實井泉間亦飲酒不親農事野行露宿貌如嬰兒素不習文
墨口占辭句頗成篇詠有道家之趣祥符四年至京師猶舛角
詔賜名度爲道士間歲或一至常居太一宮與人言多養生之
事不及外務

柴通玄字又玄陝州閿鄉人爲道士住承天觀年百餘歲善辟
穀長嘯惟飲酒言唐末事歷歷可聽太宗召至闕入對語無文
飾多以修身慎行爲說懇求歸觀真宗時來京師命坐問以無
爲之要祀汾陰復召見其所居觀自唐軒遊宮有明皇詩及所

書道德經二碑上作詩賜之資以茶藥束帛爲修道院蠲田租
度弟子二人明年春遣表自稱羅山太一洞主遣弟子張守元
李守一詣闕以龜鶴爲獻名官僚士庶言生死之要夜分盥濯
然香庭中望闕而坐遲明卒時又名河中草澤劉吳華山隱士
鄭隱敷水隱士李寧吳年七十餘以經傳講授躬耕自給授大
理評事致仕賜綠袍笏銀帶隱以經術爲業遇道士傳辟穀鍊
氣之法修習頗驗居華山王刀巖踰二十年冬夏嘗衣皮裘寧
精於藥術老而不衰嘗以藥施人報者輒拒祥符四年賜號正
晦先生上並作詩爲賜加以茶藥綸帛獨隱辭不受

甄棲真字道淵單父人博涉經傳長於詩賦遊京師入建隆觀
爲道士讀道家書以自樂初訪道於牢山華蓋先生周歷四方
以藥術濟人不取其報祥符中寓居晉州性和靜無所好惡嘗

人愛之以爲紫極宮主年七十五復遇異人稱爲許元陽語曰汝風神秀異有如李筌雖老尚可仙也因授鍊形養元之訣行之二三年漸反童顏攀高攝危輕若飛舉自號神光子與隱人海蟾子以詩往還論養生秘術目曰還金篇凡兩卷乾興元年秋謂其徒曰此歲之暮吾當逝矣卽宮西北隅自斃殯室先一月絕飲食與相知敘別以十二月二日衣紙衣臥磚榻卒人未之奇也及歲久形如生衆始驚傳以爲尸解

僧志言壽春人姓許落髮東京景德寺時厓院事清瑤誦經勤苦志言長跪願爲弟子瑤見其相貌奇古直視不瞬心異之爲授具戒然動止軒昂語笑無度多行市里褰裳疾趨舉指書空佇立良久時從屠沽遊飲陷無所擇衆以爲狂瑤獨曰此異人也有欲爲齋施輒先知之嘗不召款門指名取供溫州人林仲

方以衲來獻舟始及岸遽來取去仁宗每延入禁中徑登坐結
趺飯畢遽出未嘗揖謝王公士庶有名卽赴莫與交一言或陰
卜休咎揮紙疾書字體道壯初難解識其後多驗時皇嗣未立
上默遣內侍至其所書十三郎字以對莫測謂何後英宗入繼
果第十三衆始悟大宗正守節請書不顧迫之得潤州字未幾
薨贈丹陽郡王其前知多類此有海客遇風見僧操組引舶而
濟至都下忽遇之指曰非我汝柰何客尚記其貌大加嘆異與
曹州士趙榮善榮後棄官隱居番禺數以偈頌相寄相去萬里
數日輒達榮盛夏身死不壞言將死作頌上遣內侍塑真身爲
像置寺中榜曰顯化禪師後人見額上有光就視之得舍利
僧懷丙真定人天性巧思非學所能真定木浮圖凡十三級歲
久中級柱壞欲西北傾歷衆匠莫能支懷丙度短長別作柱命

衆工維而上已而却工以一介自隨閉戶良久易柱而下不聞斧鑿聲趙州洩河石橋銘鐵貫其中自唐以來相傳數百年大水不能壞鄉民盜鑿其鐵橋遂歆倒計千夫不能正懷丙不役衆工以術正之使復故河中府浮梁維以鐵牛八一牛且數萬斤後水暴漲絕梁牛沒于河募能出之者懷丙用大木爲樁衡狀鈎牛身以二大舟實土夾牛維之徐去其土舟浮牛出運使張燾以聞賜紫衣尋卒

龐安時廬州人幼讀書過目輒記父世醫授以脈訣曰是不足學也更取黃帝扁鵲脈書治之未久能通其說時出新意辨詰不可屈已而病瘳乃益讀靈樞太素甲乙諸秘書凡涉其道者靡不通貫獨以扁鵲之言精深其所謂難經者蓋寓其術於書而言之不詳欲使後人自求得之其術皆出於此以之視病淺

深決死生若合符節大率察脈之要莫急於人迎寸口是二脈
陰陽相應如引兩繩陰陽均則繩之大小等故定陰陽於喉手
配覆溢於尺寸寓九候於浮沉分四溫於傷寒此皆扁鵲略開
其端參以內經諸書考究而得其說審而用之順而治之病故
莫能逃矣因著難經辨數萬言觀草木之性與五藏之宜秩其
職任察其寒熱班其奇偶以療百疾著主對集一卷古今異宜
方術脫遺備陰陽之變補仲景論藥有古所未知今不能辨嘗
試有功不可遺作本草補遺爲人治病十愈八九踵門求診者
爲聞郎舍居之親視飭粥必愈而後遣其不可爲者實告之不
復爲治活人無數或持金帛來謝不盡取嘗詣桐城有民婦產
子七日不下百術無效邀安時往視纔見連呼不死令其家以
湯溫其腰腹自爲上下拊摩孕者覺腸胃微痛呻吟間生一男

子其家驚喜請問曰兒已出胞而一手誤攀母腸不能脫吾腸腹捫兒手所在針其虎口既痛卽縮所以遽生無他術也取兒視之右手虎口針痕存焉其妙如此有問以華佗之事者曰術若是非人所能爲其史之妄乎年五十八而疾作弟子李百全請自視脈胃氣已絕遂屏藥餌後數日與客坐語而卒

錢乙字仲陽本吳越支屬祖從北遷居鄆州父頴善醫嗜酒東游海上不反乙三歲母死姑嫁呂氏收養之長誨以醫告其家世乙泣請往尋八九往返迎父以歸時年三十矣鄉人賦詩美之事呂如親生沒爲收葬行服始以顙頰方著名至京師視長公主疾授翰林醫學皇子病瘳癰進黃土湯神宗召問對以土膠水水得其平則瓜自止果效擢太醫丞賜金紫公卿宗戚延請不暇常診睦親宗子病謂可勿藥而愈指在旁幼子曰是且

暴疾明日果發癰其家亟召問言火色直視心與肝皆受邪俟三日過午時當更遂愈有公主子病嘔泄本中熱脾且傷他醫與剛劑燥而加喘將不得前後洩乙與之石棗湯而效方春有病欬面青而光加以辱白且氣哽乙言此肝乘肺逆候若秋得之可療春不可療法當三日死然尚能粥當過期若五日果絕有醫言孕婦病胎且墮乙謂不然娠者五藏傳養率六旬乃更誠能候其月偏補之何必墮已而得全又乳婦因悸而病目張不得眠診之言曰系內連肝膽恐則氣結膽衛不下惟郁李能去結煮酒飲之醉使氣隨酒入膽結去膽下則目自瞑矣果驗已有麻疾自以意治之愈甚嘆曰此所謂周痺也入臟者死熟思之移使在末因自製藥日夜飲之左手足忽舉不能用喜曰可矣復製茯苓大踰斗者以法噉之雖偏廢而風骨悍堅如全

人凡爲方不名一師不斬斬守古法時度越縱舍卒與法會尤
邃本草諸書辨正闕誤或得異藥問之必言生出本末物色名
貌詳爲差別考之皆合年八十二舉痺痼劇知不可爲召親戚
訣別易衣待盡而卒

僧智緣隨州人善醫藥且有口辨嘉祐末召至京舍于相國寺
每察脈知人貴賤禍福休咎診父之脈而能道其子吉凶所言
若神士大夫爭造之王珪疑古無此安石曰昔醫和診晉侯而
知其良臣將死夫良臣之命乃見於其君之脈則視父知子亦
何足怪哉熙寧中王韶言蕃族重僧結吳叱臘部帳甚衆請與
至邊而說之神宗召見賜白金遣乘傳而西稱經畧大師徑入
蕃中說結吳叱臘歸化而他族俞龍珂禹藏訥令支等皆因以
輸款韶反忌惡之名還以爲右街首坐卒

郭天信字佑之開封人以技隸太史局徽宗爲端王時嘗密進
王言富有天下旣而卽位因得親暱不數年至樞密都承旨其
子中復爲閤門通事舍人許陪進士試大廷擢校書郎尋改還
武爵政和初天信拜定武軍節度副神觀使頗與外政見蔡京
亂國每託天文撼帝云日中有黑子帝懼京遂見黜張商英方
有時望欲借左右游談之助陰與相結使僧德洪輩道達語言
往往稱於內朝後商英眷衰京黨告天信漏泄禁中語每事必
先發端窺伺上育動息以報商英無不如志及商英罷張克公
列其罪貶昭化軍節度副使單州安置再貶行軍司馬竄新州
命宋康年使廣幾其起居至數月死京疑其挾術選吏發棺驗
視

魏漢津本蜀縣卒先從范鎮窺其制作後托師事蔚仙人李良

號李八百者。授以鼎法。兼通陰陽術數。言多奇中。嘗過三山龍門。聞水聲。知其下有玉。脫衣浚水。抱石而出。果玉也。皇祐中。與房庶俱以善樂薦得名。見獻議本黃帝夏禹聲律身度之說。謂人主賦形與衆異。謂以帝指三節三寸爲度。定黃鐘之律。而中指之徑圓。則度量權衡所自出也。又云。聲有太有少。太者清聲。陽也。天道也。少者濁聲。陰也。地道也。中聲在其間。人道也。合三才之道。備陰陽奇偶。然後四序可得而調。萬物可得而理。當時以爲迂怪。蔡京獨神之。從其請。先鑄九鼎。次鑄帝坐大鐘。及二十四氣鐘。崇寧四年三月。鼎成。奉安于九成宮。賜號冲顯處士。時年九十餘。八月。新樂成。賜名大成。樂置府建官加賜。虛和冲顯寶應先生。頒其樂書天下。嘗與京言。大成獨得古意。什三四爾。他多非古說。異日當以訪受學弟子。任宗堯而京客劉昂主。

崇事論太少之說爲非將議改作旣而以樂成久易之恐難遂止漢津議制鼎名以奠八方曰蒼鼎彤鼎晶鼎寶鼎魁鼎烏鼎壯鼎風鼎凡八而中央曰帝鼎皆以九州水土納其中及奉安翌日上幸九成宮酌獻至北方寶鼎忽漏水溢于外曷謂取土於雄州界非燕之正方後乃終於北方致亂當時莫不神之漢津嘗語所知不三十年天下亂矣未幾死京遂名宗堯爲典樂復欲有所建而爲田吳所奪語在樂志後卽鑄鼎之所建寶成殷祀黃帝夏禹成王周召封漢津爲嘉侯與良咸配食有馬賁者亦出京門在大晟府方魏劉任田議論時依違其間無所質正擢至通議大夫敍猷閣待制當時名器之濫如此

楊傑字次公無爲人少有文名擢進士元豐中數任太常預議玉牒并討論當世禮樂之事言本朝自僭祖而上帝系莫考請

尊爲始祖配感生帝其說遂定時孝惠賀后章懷潘后孝章宋
后升祔之禮久而未講傑請斷天下之大疑正宗廟之大法因
慈聖光獻崇配之日並升四后神主祔于廟室後皆從之哲宗
時圖上大樂七失言侍郎范鎮樂章曲名加磬十六悉以爲非
又論以黑黍用秬制律叩之不合以世無其黍用太府尺定黃
鐘銅量凡下舊樂三律詳具樂志以是鎮之樂律卒不得用元
祐中爲禮部員外郎出知潤州除兩浙提點刑獄卒年七十自
號無爲子有文集二十餘卷樂記三卷

劉詵字應伯福清人登進士歷莆田簿知廬江居母喪盡禮有
雙芝生墓側人以爲孝感崇寧中出講議司檢討歷軍器大理
二丞以素通音律授大晟府典樂嘗上歷代雅樂因革及宋制
作之音言周官大司樂禁淫與慢聲卽孔子之意今燕樂之音

失於高急曲調之詞又多鄙俚恐不足以名和氣宋火德音尚
徵徵調不可闕臣按古制旋相爲宮以七聲得正徵一調惟陛
下裁取徽宗喜曰卿言朕所欲聞宜爲朕典司其事委以專掌
他日禁中出古鐘二詔詵按適與今太族太呂聲協命取大晨
鐘扣之果應因奏鐘擊之無餘韻不如石磬詩云依我磬聲者
言其清而定也復取以合之聲益諧後歷宗正鴻臚衛尉太常
四少卿蔡續因革禮卒

陳暘字晉之福州人與兄祥道字用之皆以禮樂顯名暘中紹
聖制科授順昌軍節度推官徽宗初進筵衡集以勸尊紹述得
太學博士改秘書正字所著樂書貫穿明備趙挺之薦遷太常
丞進駕部員外郎爲講議司參詳禮樂官與魏漢津議樂用京
房二變四清以爲五聲十二律樂之正也二變以變宮爲君四

聲以黃鐘清爲君樂之徽也夫事以時作固可變而君不可變
大呂夾鐘或可分而黃鐘不可分豈古人所謂尊無二上之旨
哉時論方右漢津紉腸議進太常少卿禮部侍郎終顯謨閣待
制提舉醴泉觀年六十八祥道元祐中爲太常博士終秘書正
字所著禮書一百五十卷與賜樂書二十卷並行于世

王老志濮州臨泉人遇異人自言鍾離先生予丹服之若有所
覺遂棄妻子結廬田間爲人言休咎其門如市政和三年太僕
王亶以聞召至京師館于蔡京第嘗緘書一封至帝所徽宗啓
讀乃昔歲中秋與喬劉二妃燕好之語帝驚信以爲神封爲洞
微先生朝士多從求書初若不可解卒應者十八九嘗獻乾坤
鑑法謂帝與后他日皆有難請鑄成時坐鑑下思所以做懼消
變者明年其師再見貴以擅處富貴亟丐歸至濮而死賜金以

葬贈正議大夫爲人性謹畏事親以孝聞初爲小吏不受賂王
黼父令臨泉問黼名位書宰相字旋以墨穢之敗後乃悟

王仔昔洪州人始學儒自言遇許遜得大洞隱書俗落七元之
法出遊嵩山能道人未來事政和中召見賜號冲隱處士帝遣
小黃門因旱禱雨且默祝爲宮妃療赤目命持紙來篆符其上
細書焚符說用湯沃之一洗而愈進封通妙先生每待以客禮
居上清寶籙宮獻議九鼎神器不可棄於外合移禁中建圖象
徽調問以貯之居常倨傲性少愆遇巨閹若童奴又欲羣道士
皆宗已及林靈素有寵於宦者馮浩忌之陷以事囚東太一宮
俄下獄死臨終誓示其徒曰上蔡遇寇人其後浩果南竄至上
蔡被誅

林靈素溫州人少從浮屠學仇其師笞罵去爲道士與王允誠

共爲神怪善妖幻往來淮泗間丐食僧寺厭苦之政和末仔背等龍袞上訪方士於左道錄徐知嘗以靈素對召見謬爲大言天有九霄神霄爲最高神霄玉清上帝之長子主南方號長生大帝陛下是也死下降于世其弟號青華帝君主東方攝領之已乃府仙卿褚慧下降佐帝君之治蔡京乃左元仙伯王黼乃文華吏盛章王革亦園苑寶華吏及鄭居中童貫諸巨閹皆爲之名劉貴妃方有寵號以九華玉真安妃帝心喜其事與張虛白俱賜號靈素通真達靈先生虛白通元冲妙先生賞賚無算建上清寶籙宮密運禁省詔天下皆建神霄萬壽宮旋又造爲青華正登臨壇及火龍神劍夜降內宮之事假帝詰天書雲篆務以欺世惑衆其說妄誕不可究質然實無所能惟稍識五雷法名呼風霆間禱雨有小驗而已吏民詣宮受神霄秘錄及朝

士嗜進者咸靡然趨之每設大齋輒費緡錢數萬謂之千道會
帝設幄其側靈素升高正坐問者皆再拜以請所言無殊異雜
以捷給詎諧時資蝶笑其徒美衣玉食幾二萬人建立道學置
郎大夫十等其諸殿侍晨校籍授經侔擬待制修撰直閣因遲
前憾欲盡廢釋氏悉改其名稱冠服上益尊靈素升溫州爲應
道軍節度加號元妙先生金門羽客冲和殿侍晨出入呵引輒
與諸王爭道都人稱曰道家兩府忌允誠軋已辨之死宜和初
都城暴水遣往厭勝方率其徒步虛城上役夫爭舉挺擊之走
而免帝知爲衆所怨始有不樂之意居京師四年愈益橫恣道
遇皇太子弗歛避太子入訴帝怒責爲太虛大夫斥還故里命
通判江端本幾察之廉得其居處過制罪徙楚州安置已死遺
奏至猶厚待以禮葬焉

王繼先開封人姿黠善佞建炎初以醫得幸後廢貴寵至和安大夫開州團練使初尚致仕尋以覃恩落之授武功大夫富直柔奏駁命乃寢旣而特授榮州防禦使診視太后疾有勞命主管翰林醫官特補其子悅道朝奉郎閣門祇候論者切齒乃陽乞致仕以避人言又詔遷秩二等許回授除右武大夫華州觀察使餘人不爲例吳貴妃進封又遷奉寧軍承宣使妻郭氏封郡夫人子安道武泰軍承宣使守道朝議大夫直徽猷閣孫錡承議郎直秘閣一時遭遇冠絕諸大帥承順下風莫敢少忤權勢與秦檜埒檜使其夫人請之敘邦兄弟表裏引援改昭慶軍又欲得節鉞使其徒張孝直等校本草以獻給事楊椿沮之計不行繼先富埒王室子弟通朝籍總戎寄姻戚黨與盤據要途數十年間無能搖之者金將渝盟劉錡請爲戰備繼先倡育新

進主兵官好作弗靖若斬一二人和好復固帝不懌曰是欲我
斬劉錡乎御史杜莘老劾其怙寵干法十罪詔徙福州居住子
孫並勒停放還良家子女百餘人籍其貲以千萬計天下快之
後竟以貶死

皇甫坦蜀之夾江人善醫術顯仁太后苦日疾國醫不能療臨
安守臣張偁以坦聞高宗召見問何以治身坦曰心無爲則身
安人主無爲則天下治引至慈寧殿治目疾立愈帝喜厚賜之
一無所受令持香牒青城山還復召問以長生久視之術坦曰
先禁諸欲勿令放逸丹經萬卷不如守一帝歎服書清靜二字
以名其菴且繪其像禁中荆南帥李道雅敬坦坦歲謁道隆興
初道入朝高宗孝宗問之皆稱皇甫先生而不名坦又善相人
皆相道中女必爲天下母後果爲光宗后

莎衣道人姓何氏淮陽胸山人祖執禮仕至朝議大夫道人避
亂渡江嘗舉進士不中紹興末來平江一日自外歸倏若狂者
身衣白襦盪勺食于市夜止天慶觀久之衣益敝以莎緝之嘗
遊妙嚴寺臨池見影豁然大悟人無貴賤問休咎罔不奇中會
有瘵者乞醫命持一草去旬日而愈衆翕然傳莎草可以愈疾
求而不得者或遂不起由是遠近異之孝宗一夕夢莎衣人跣
哭來弔訊之曰蘇人也詰其故不肯言帝寤以語內侍會后及
太子薨帝哀泣內侍進前慰釋并道前夢帝矍然因遣使召之
不至帝念恢復大計累歲未有所屬后位虛且久乃焚香默祝
遣中官致贊不言所以道人見之掉首吳音曰有中土卽有外
裔有日卽有月不須問趣之去使者歸奏帝甚異之賜號通神
先生爲築菴觀中賜衣數襲皆不受好事者強邀入菴大笑而

出衆日以珍饌餉之每食于通衢建飽卽去帝歲命內侍卽其
居設十道齋合雲水之士施予優普一歲偶踰期衆咸訝而請
道人亟起於臥握手瞬目招之曰亟來亟來是日內侍至平望
衆益服其神光宗卽位名之又不至慶元六年卒

王克明字彥昭其始饒州樂平人後徙烏程初生時母乏乳餌
以粥遂得脾胃疾長益甚醫以爲不可治克明自讀難經素問
以求其法刻意處藥其病乃愈始以術行江淮入蘇湖鍼灸尤
精診脈有難療者必沈思得其要然後予之藥病雖數證或用
一藥以除其本本除而餘病自去亦有不予藥者期以某日自
安有以爲非藥之過過在某事當隨其事治之言無不驗金使
黑鹿谷過蘇病傷寒垂死克明治之愈及從徐度聘金黑鹿谷
適爲先排使待克明厚甚克明訝之谷乃道其故由是名聞北

方後再從呂正已使金金接伴使忽被危疾克明立起之却其謝張子益救海州戰士大疫克明時在軍中全活幾萬人子益上其功力辭克明頗知書好俠尚義常數千里赴人之急初試禮部中選累任醫官王炎宣撫四川辟克明不就炎怒劾克明避事坐貶秩後遷至額內翰林醫痊局賜金紫紹興五年卒年六十七

孫守榮臨安富陽人生七歲病醫遇異人教以風角鳥占之術其法以音律推五數播五行測度萬物始終盛衰之理凡問者一語頃輒知休咎守榮既悟異人授以鐵笛遂去不復見守榮因號富春子吹笛市中人初不識也然其術率驗寶慶間遊吳興聞譙樓鼓角聲驚曰旦夕且有變土人當有興郡者見王元春卽賀曰作鄉郡者必君也春不之信越兩月潘丙作亂元春

以告變功果與郡自是富春子之名大顯貴人爭延致之淮南
帥李曾伯薦諸朝既至謁丞相史嵩之聞者以畫寢辭守桀曰
丞相方釣魚園池何得云爾聞者驚異入自丞相遽見之自是
數出入相府一日庭鵲噪令占之曰來日晡時當有寶物至明
日李全果以玉柱斧爲貢嵩之又嘗得李全檄藏袖中以問守
桀答曰此賊詐假布囊二十萬爾剝封果如其說士大夫詢校
歷不盡答私謂所知曰吾以音推諸朝紳互有羸縮宋祿其殆
終乎後果驗

廖應淮字學海盱江人抱負奇氣好研磨運世推移及方技諸
家學年三十游杭疏丁大全誤國狀大全怒中以法配漢陽軍
抵漢江濱遇蜀道士杜可大授以邵堯夫先天學其書自王豫
天悅死葬玉枕中吳曦叛盜發其塚得書其算由聲音起應淮
弘簡錄

神鑒頴利凡指畫未到能以已意逆悟學既成去隱宜歛間復之杭書市大街數夜沽酒痛飲醉輒大叫天非宋天地非宋地奈何奈何復賦詩見意都人士聞之指以爲怪嘗居層樓間空中戎馬百萬作哭泣聲無何宋事日非沿江州郡望風奔潰復大勦自殺氣又入閩廣中吾不知死所矣遂遁去其言無一不驗年五十二病死後以其學傳進士彭復復授鄱陽傳立立授德興齊琦所著有玄玄集曆髓星野指南象喻統會聲譜畫前妙用數十萬言